



EDITORIAL

Pa: Jossy M. Mansur

Natalee: Un misterio cu tin solucion!

Un di e casonan cu e perfil mas halto conoci den temponan reciente, a sosode na Aruba y a mantene (y ta sigui mantene) e atencion di Pueblo Arubiano y Pueblo Americano, mescos cu otro pueblonan rond di mundo, mara na dje pa conoce e poco detayenan real cu ta ser suministra. Na Aruba, comentarionan expresa pa diferente "expertonan" na Merca a causa basta disgusto, ya cu di berdad e comentarionan ey no ta ahusta nan mes na e realidadnan di nos isla, ni di nos Cuerpo Policial.

Varios di nos (incluyendo abogadonan) a dicidi di papia abiertamente cu e medionan di comunicacion gigantesco cu ta na Aruba, pa satisfice e demanda titanico cu tin pa conoce e desaroyonan di e caso. Criticanan infunda ta ser lanza contra nos, no pasobra nos ta decidido na papia e berdad, sino pasobra envidia ta algo dificil pa mantene bao control.

Tende shonnan: mas bo purba sconde e berdad, mas duro e ta bay dalbo ora e sali! E daño cu ta ser bisa cu e medionan ey a causa Aruba ta superficial, momentaneo, y producto di mentenan poco analitico. Bay haci nos mes ridiculo riba caya cu borchinan denigrante pa Merca o su medionan di comunicacion mas grandi den noticia, ta propio di hendenan sin cerebro, sin e capacidad real pa midi e consecuencianan di tal actonan. Laga e defensa di Aruba den man di e Americanonan mes, y di nos cu ta dispuesto di contesta cualke pregunta cu nan tin sin ningun temor di papia e berdad. Corda cu e bataya entre David y Goliat ta un parabola di Biblia. Awendia, di 1000 bataya asina, den 999 caso, Goliat lo guli David bibo!

Ademas, e propaganda pa Aruba como isla turistico, como destino deseable pa pasa vacacionnan agradable, ta asina inmenso, cu no tin suficiente placa pa paga un seconde di dje. E imagennan propaga pa tur e canalnan ta asina bunita cu mi mes a haya gana di bolbe bishita beachnan cu mi tin mas di 30 aña sin disfruta. Hendenan cu ta biba riba e lugarnan mas remoto na mundo sa awor di Aruba, unda e ta keda, con bunita su beachnan ta, con atractivo y moderno su hotelnan ta, y ora e caso aki yega na su conclusion (y e ta bay yega!) e boom den e turismo pa Aruba ta bay ta asina enorme cu e ta bay laga tur hende babuca!

Awor un pregunta cardinal: pakico no a permiti FBI participa activamente den e caso? E ta presente desde e prome dia banda di Polis, como observadornan, dialogando y compartiendo experiencia cu nos agentenan, pero no libre pa participa activamente den e investigacionnan. Lagami compara e participacion di FBI cu e atencion medico cu nos hendenan ta haya den exterior. Ora cu un pacient na Aruba, por ehemplo, den un estado avanza di su maleza, no por ser atendi mas pa nos docternan, kico nos ta haci cune? Nos ta lague muri den hospital of nos ta mande afo pa e tratamiento adecuado cu na Aruba nos no tin? Claro cu nos ta mande afo pa

scapa su bida! Esey no kier meen cu nos docternan ta incompetente, ni cu nan no sa kico nan ta haciendo, sino cu nos no tin e aparatonan sofisticada cu e paisnan grandi si tin.

Idem pa nos Cuerpo Policial. Esaki ta un caso cu, pa motibo di su implicacionnan, pa motibo di e misterio involvi, pa motibo di e demotivacion causa pa Ministro di Husticia den su guerra contra nos Polisnan, mester a ser habri pa complementacion cu e agentenan veterano di FBI, un di e cuerponan mas profesional na mundo! Y completamente gratis! Treciendo nan aden no ta ningun refleho riba e capacidad di nos polisnan; al contrario, e ta demostra nan profesionalismo y nan boluntad pa resolve e caso di e manera mas eficiente y rapido posible.

Actualmente, un submarino chikito di Rusia a pega bao laman y tres pais a ofrece ayuda na Rusia (un pais gigantesco!). Merca, Inglatera y Japon. Kico Rusia a bisa? No, mi no kier boso ayudo? No! El a bisa cu e ta acepta tur ayudo cu por salba e bida di e tripulantenan abordo di e submarino! Y nan a ser salba tambe! Ata un pais enorme, cu tur clase di tecnologia, cu ta acepta ayudo di otro paisnan, pakico nos na Aruba no por haci mescos?

E carta di Nel y Rudy riba su mes no ta suficiente; e mester a bay mas leu den consulta cu Relacionnan Exterior na Hulanda, pa nan tuma e iniciativa di contactonan cu e Departamento di Estado na Merca y permiti, mescos cu nos ta permiti e intervencion di docternan na Houston, Venezuela y Colombia, e intervencion di e agentenan super-efectivo di FBI!

Esnan cu kier sigui critica nos intervencionnan na television por wel di sigui hacie pasobra den mi caso e no ta bay tin ningun efecto: mi ta bay sigui suministra Pueblo Arubiano y Pueblo Americano cu e detayenan cu na DIARIO nos ta logra averigua via nos contactonan. Pueblo, den su mayoria absoluto, sa cu mi no ta bay pensa, papia o haci algo cu ta bay contra e interesnan di Aruba.

Mi ta di e opinion cu nos ta yegando a conclusion di e caso. E no ta un misterio cu ta bay keda sin solucion. Nos agentenan policial, y Ministerio Publico ta hopi mas prepara pa hiba e caso Corte di loke hopi ta pensa. Fiscal Janssen ta sinti su mes fuerte para, y pa loke ta trata e team di investigadornan Arubiano, encabeza pa e semper efectivo Roy Tromp, ta totalmente competente y tin suficiente prueba caba pa presenta (via Fiscal) un caso solido contra e culpablenan den e desaparicion di e ciudadano Americano, Natalee Holloway, cu a bin Aruba pa celebra su graduacion, y a desaparece. E caso merece tur e atencion cu nos por dune pa resolve, y asina permiti su famia hibe back Birmingham, pa asina reasumi nan bidanan y logra e paz spiritual y mental cu nan tin mester pa sobrevivir e perdida di un yiu, cu ta un tragedia di enorme magnitud.